

埽垢山房詩鈔

埽垢山房詩鈔第五卷目錄

過三十年前讀書處有感四首

路旁天桃花

題淨因所畫梅花贈羅養齋

家次和齋中賞盆菊和春谷韻

同李濱石坐次和齋中看盆菊再和春谷

韻

次和招集同人賞盆鞠卽席分體賦詩得

絕句二十首

壽吳栢槎六十

江外草堂席上賦食物得寶坻銀魚

題汪漣碧小像二首

贈方菊人

贈方月查

哭石莊和尚二首

題朱淨亭乘槎圖

題汪損之小像

贈劉嵩嵐

己未端午前一日阮芸臺侍郎手書致闕
里孔怡齋上公之聘臨行留別山妻及

二子

舟中枕上

過高郵懷亡友宋綬來

寄德華弟

寄淨因

登岸見新秧彌望得二十八字

有感

獨對

鄰舟有客自稱得相人之秘所以慰予者
甚厚笑而答之以詩

鈞臺

憶九妹病

黃河舟中憶揚州湖上

黃河二首

道旁鳳仙花盛開喜而有作

秉燭

晚發崔鎮

偶起

宿遷關

黃河舟中料理詩文舊稿有懷姚姬傳曾

賓谷兩先生

驟雨

舟中懷趙介南

予友李艾堂有春日揚州咏柳詩予極賞其神韻舟中見綠柳彌望作斷句寄李兼憶揚州諸故人

食魚

檢行篋得時人詩刻二種卽書其後四首

舟中憶方晴檐家春谷時聞二君同舟南
還

泊姚灣

邳州道中淮浦至此始見山色

泊黃泥岡

埽垢山房詩鈔第五卷

甘泉黃文暘

過三十年前讀書處有感

頽垣一帶鎖斜陽
誰認當年舊講堂
載酒久無人問字
讀書曾見月窺牀
碑殘鼻肩名猶在
壁掃龍蛇蹟已亡
卅載重來堪痛哭
死生聚散總茫茫

昆明何處辨殘灰
華表眞同雀再來
砌敗尚

疑茶灶在塵飛錯認筆花開
休誇萬卷書能破猶記雙桐手
自栽落葉滿堦如舊識也隨
衣袖共徘徊

根觸愁端百感縈更無人處
遶堦行舊綠桑下曾三宿癡
夢槐陰了一生椒桂已虛名
士兆苔岑常識友朋情兩齋
分席難忘處辛苦長檠共短檠

擅場昔此奏雲和顧影蕭蕭
奈老何白首論

交前輩少青山埋骨故人多數椽破屋星曾
聚一代雄文氣不磨大息師門零落盡獨依
庭樹發悲歌

路旁天桃花

路旁天桃花盈盈好顏色春郊多游騎紛紛
競賞識獨有貴公子珍重爲移植或恐花亂
飛週遭種荆棘種棘爲護花豈愛棘心直就
知棘多刺稜稜不可泐花顏艷我心徘徊每

終夕棘刺易傷手
傍徨不敢摘
徹棘花易飛
留棘人難入
操斤伐棘條
棘根移不得
空教棘苦辛
對花長太息
棘敬告公子
我本山中客
爲君一出山
故山蹤已失
雨露本非望
剪伐又何惜
請君伐作薪
聊以報君德
煮酒烹羔羊
賞花供綺席

題淨因所畫梅花贈羅養齋

老妻畫梅秀可餐
我將梅作故人看
常逢天

氣三春冷只釀人間一味酸跡寄空門賈島
瘦詩多苦語孟郊寒他年國史傳高士莫與
孤山一例觀

家次和齋中賞盆鞠和春谷韻

知我愛花邀我坐花光不定舞仙仙數枝當
晝舒鸞羽一蕊凌空下鵲拳種得異苔如舊
識移來奇石是前緣一盆分我尤佳妙碧水
澄清映遠天

鞠名天水碧

同李濱石坐次和齋中賞盆鞠疊前韻
脫盡千秋籬下苦方知秋鞠是花仙金盤凝
露初舒掌鈎弋承恩未放拳碗茗爐香同位
置雲堦月地結因緣笑他處士眞寒乞辜負
橙黃橘綠天

家次和招集同人賞盆鞠卽席分體賦
詩得絕句二十首

生平不肯居人下最厭霜枝寄短籬今日公

然爲上客老夫爲爾一舒眉

須知在野終爲草直到經秋始放香
看取花宮頌九錫特徵處士晉眞王

四圍絳蠟二分月五色流蘇百和香
寫出秋花眞富貴始知桃李太尋常

花花葉葉神能淡色色枝枝韻不同
莫認徐熙出新樣意中春色寫屏風

沉綠小盆雕翡翠退紅矮几架珊瑚
坐花最

愛瓊筵啟值得餘杭酒百壺

并剪分枝芟敗葉清泉醮筆滌泥塗洗桐高
士成千古又畫秋風洗鞠圖

酒醒東第奇章石屋比南湖魯望舟滿載名
花與賓客風光直似洛濱游

鏤金刻翠生光彩撚蠟裁絨鬪麗華莫怪吾
家花獨好茲花本自號黃花

瘦螭寒蟹元好問風莖月朶陸龜蒙好詩只

有花能賞怪底詩成總化工

金谷酒多花亦醉玉山堂好客原多我來本
不分賓主側帽花間發浩歌

士逢知己何辭死藝解趨時未必工收拾寒
香供几案花情人意許相同

軋苗應遭紅勒帛清微誰賞紫沉檀幽齋排
設須商畧高品從來位置難

論評自定花三品棄置真同草一莖過眼可

憐迷五色歐陽慚愧主文衡

杜陵詩律老彌細庾信文章老更成白髮對
花秋共老乾坤清氣此間清

少年花共三春麗人老花羞兩鬢絲如此頭
顛真可笑掉花莫折好花枝

花開不厭逢今雨花好偏宜聚古狂自笑狂
夫年老大顛狂還似少年場

阿兄種鞠花成畫阿弟吟花筆似椽與我周

旋都愛我自疑身是鞠花仙

貯恨瓊枝留謝客緘愁金鈿寄袁郎遠游我
有天涯友折得茱萸更斷腸

同居委巷如三逕分得秋光照四鄰風雨不
嫌人寂寞花時莫厭往來頻

讀畫煮茶消永日窮經評史共孤檠交情原
似花情淡種鞠年年作証盟

壽吳栢槎六十

我生歲丙辰君生歲乙卯雁行接秋旻鶯鳴
和春曉君有山水癖我亦林泉老朝夕共情
慄風雨通襟抱君飲能吞海百川欲傾倒我
不勝蕉葉自慚酒戶小空盃陪巨觥狂言肆
奇矯人生百年中性情自探討世態日紛紜
吾心無曲撓但得友朋樂何須富貴早花月
自年年勝游做蓬島君今年六十瑩然顏色
好不與世爭趨所以天自葆種鞠汲壽泉採

芝伴商皓從此到期願傾盃祝壽考釀盡東
海水酒懷常浩浩

江外草堂席上分咏食物得寶坻銀魚
水滑溫泉網素魚冰絲縷縷伴寒蒞哈山霜
重秋偏早始信蓬萊不可居

汪子漣碧以扇頭小景索題作此贈之
與爾知心久常憐見面稀肝腸同潔白樹石
寫清微瘦健留文骨精神發德輝間雲將出

岫會否決從違

我已皈初地心絲漸解紛鋤雲如可伴盃飯
許同分托足見三世回頭別一軍清音山水
在諸佛共聲聞

贈方鞠人

清者多難厚此君味獨深人無不可處塵自
不能侵渾渾隨羣動超超養道心吾生觀物
久爲爾發高吟

贈方月查

一書三萬字字字似蠅頭人更瘦于字氣原
清若秋老夫希入道之子可同游尚有鷺羣
在黃庭換得不

哭石莊和尚

和尚久主淮安湛真寺方丈退居楊州桃花菴工畫

由水善吹簫其徒甘亭善田皆予詩弟子也

迦文行處拂游塵不借箝錘說苦辛畫手直
升摩詰座簫聲如見美人身過來淮水登慈

岸種得桃花結古春。八十年間遊戲足。愛他
一笑證前因。

岐路營營喚奈何。幽棲地僻愛經過。盤中蔬
筍餐常勸。物外烟霞語最多。三世償他生死
淚。謂和尚及西崖竹堂兩大師一身剩我短長歌。誌銘敢
負前塵諾。待把寒山片石磨。和尚生前有塔銘之托

題朱淨亭乘槎圖

銀河直掛白雲間。一到塵中便曲灣。好向源

頭尋活水漫從間尾覓神山通天路險憑忠
信貫月槎靈任往還卻笑鑿空張博望不持
片石返人間

題汪損之小像

危坐深山叢木之中葫蘆繫腰一子侍立虎卧

其側

深山虎之宅爾人胡爲來虎原避人山裏住
人偏逐虎誇奇恢石齒齒兮徑偏側林冥冥
兮晝深黑潛伏牙爪伺爾旁待以至誠彼豈

識此物可殺不可豢須識危機在呼吸我生
區區拙且迂坦道猶需一杖扶展君此圖心
慄慄胡爲兀坐如安居空言道德吾不取安
能捨生談元虛嗟爾生平身作餌猛獸眈眈
礪牙齒壺中有藥度不得作爲此圖有深旨
何不攜子早歸來南村買田闢蒿萊牛背安
穩橫短笛與君耦耕無嫌猜

贈劉嵩嵐

巨椎當頭無不中利斧從不避橫理丈夫披
胸對天日安用兒女語旒旒門戶餘習澆風
雅描畫頭角工摩擬天下文章奉官樣筆墨
無靈性情死我是涪翁後代孫濯腸愛掬西
江水生平崛強期自立眼中落落輕餘子甲
寅之歲夏四月月陽在巳陰在巳時良月吉
占同人我輩聚會觀天咫尺千秋事業待評論
豈似浮萍合風裏翩然仙令遠相訪叩門一

介通名帑我似任華識李杜把箒掃逕爲狂
喜是時當堦綻紅藥香風吹入鱖魚市青梅
如豆枇杷熟天爲詩人供芳旨江郎子屏開

燕特招邀促膝啜盃共汝爾座上汪倫情最

凝蔚雲淚滴重泉憶簪珥美人黃土名士老

滿座慘然共傾耳心傷腸斷醉不知失足一

跌笑短李艾堂知己悅已惟一情何分几席

與床第劉郎感此飲愈豪酒氣淋漓出十指

據案草成芍藥吟六義紛綸追正始懷中更
出一卷詩力厚氣清絕渣滓巨靈揮斧劈青
山朱亥袖椎擊晉鄙軒豁呈露萬象開元氣
充周豈形似天風鼓盪山嶽走紛紛吹盡糠
與粃直把肝腸寫似人知爾生平絕摩揣我
有新詩三百首一一襟懷竟端委愛惜不與
世人見每每桃鐙自臧否讀君茲編我知愧
誓將爲君執鞭筆

己未端午前一日阮芸臺侍郎手書致
闕里孔怡齊上公之聘臨行留別山
妻及二子

閉戶生平志。司徒致遠書。就徵趨闕里。息影
戀寒廬。藥裏扶高枕。山妻善病經畚付古鋤。遲回
念妻子。臨發重欷歔。

舟中枕上

一天涼雨送孤舟。魂夢淒然感舊游。暮齒乍

驚催遠適全家忽教結離憂照人不見二分
月戀體還餘五月裘惟喜高山親仰止預澆
河水洗雙眸

過高郵懷亡友宋綏來

吐納終何用求仙事亦愚立身原近古好學
獨宗吾每灑無兒淚空懸賣藥壺孤墳渺何
處宿草應荒蕪

寄示德華弟

汝昔游江漢憶汝不得見我今適齊魯汝心
倍淒戀可憐衣與食迫使恩情渙風雨事長
征念汝發喟歎殷勤督諸姪戒其耽戲玩堅
持利人心母爲利欲絆

弟善瘍醫

寄淨因

飛絮吟成兩鬢霜揚州風雅嗣徐梁

許徐德
音汪梁

佩蘭消閑好討詩書樂望遠休憂道路長助我

營巢同翼燕

時予卜居未定
借住友人老屋

任他射獵莫臧

狼

實有其人

自憐廡下低頭慣辛苦難忘是孟光

登岸見新秧彌望得二十八字

水田漠漠碧如油遍插新秧卜有秋一望青
青青不斷綠楊回首憶揚州

有感

泛愛弟子事擇交丈夫心投足一不慎抱慚
影與衾涇渭流自異蕭艾不同林箏琶雖悅
耳安可混瑤琴磨涅敢自試磷淄漸以深端

坐一自省愧汗下泔泔仰天發長嘯明明商
與參

獨對

獨對一鐙明孤舟欲二更寂無人語共暗聽
夜潮生客思衾頻展鄉心夢不成荷勅原有
約悔不事躬耕

鄰舟有客自稱得相人之秘所以慰予
者甚厚笑而謝之以詩

浮生勘破等浮漚多謝先生說馬周相少三
壬原自見年過六甲又何求鳶肩不驗身終
賤鴻瓜深慚跡尚留我有區區君識否照人
肝膽似清秋

釣臺

不信韓侯負乃公釣臺千古哭英雄但看一
飯還能報豈待披心謝蒯通

憶九妹病

病深憐九妹。離別更傷情。望見先含淚。歸來
早計程。送予悲遠客。似我愧諸甥。計日迎新
婦。時外甥胡昞往全椒迎吳山尊之妹與予同日屈行遙知疾漸輕。

黃河舟中憶揚州湖上

故鄉景物最清華。十里平湖兩岸花。畫舫笙
歌遲夜月。仙樓簾幙罨朝霞。自憐詩酒年年
慣。不耐烟波處處家。閒倚蓬窗回首望。蕭條
極目見平沙。

黃河

尋源上與白雲齊何處崑崙指極西一到人
閒形自曲算來山下路原低九河未復千年
迹石水常留六斛泥 聖主勞心憂瓠子河
臣努力事金堤

推窻老眼重揩摩形勢天成可奈何南徙自
然堤日削東流太急水生渦趨歸原未侵淮
浦揖盜終嫌濟漕河我是杞人憂太甚醉來

擊楫且高歌

道旁鳳仙花盛開喜而有作

蕭蕭白髮遠辭家老眼朦朧似霧遮笑我風
情偏不減道旁還看女兒花

秉燭

秉燭蓬窻几自凭閒拋書卷思難勝家中晚
飯應纔罷弟妹妻兒共一燈

晚發崔鎮

帆帶連朝雨舟行六月涼
羈間惟戀枕衣薄
嬾開箱計日知程遠
航吟遣路長好風催晚
發卧聽水湯湯

偶起

偶起推窻看蒼茫
日色黃有心呈水監
無意問河防
獨樹根株古
奔流道路長
吾生知有極
行止待商量

宿遷關

關吏休相問勞君洗眼看身輕千里近裝少
一舟寬腹筍猶堪檢行囊不足觀我來懷寶
過笑爾夫譏彈

黃河舟中料理詩文舊稿奉懷姚姬傳曾

賓谷兩先生

詩文一一手親刪久被時人笑破顏河伯無
心觀大海巨靈有掌劈名山蜀岡較藝心先
折賓谷先生都轉兩淮于予有鍾阜談經鬢
國土之知時入觀京師

早斑姬傳先生爲予授業師時主鍾山書院講席
地北天南兩知
已感深老淚落潸潸

驟雨

東南風急帆脚直黃河浪大舟傾側榜人失色急捩舵雲壓船窻苦深黑電旗雷鼓聲隆隆深搜蛟室鞭癡龍翻身直到重霄上怒揮部從驅雨工西江吸盡供揮灑要使甘霖遍大野此時深艙苦悶熱盡解衣裳汗盈把滿

五十一
三
瓶蓋覆防船漏兀坐張燈任傾瀉忽聽鳴金
又起俄開窗旭日滿艙紅雨散雲收波浪靜
翻疑午睡成夢夢一時陰晴太反覆底怪世
事如轉蓬

舟中懷趙介南

白雪披肝膽論交愛此君孤舟頻入夢接席
細論文書院較藝予與介南常同硯席夢中猶入此境妻子曾相托
鄉書早寄聞思之不得見離緒最紛紜

予友李艾塘有春日揚州詩云城裏楊
花城外柳春風吹過小東門子極賞
其神韻舟中見綠柳彌望作斷句寄
李兼懷揚州諸故人

風流短李舊王孫。解唱楊枝最斷魂。
柳色一堤看不厭。春風又憶小東門。

食魚

一聲潑刺躍舡倉。買得金鱗尺半長。
慚愧此

行差不負黃河汲水煮河魴

檢行篋得時人詩刻二種卽書其後

格律唐賢在安容僞體叅高言欺漢魏俯首
拜鍾譚擬學能言鳥先如到死蠶乾坤清氣
在未許妄譏彈

艱深猶可諫輕薄最堪悲巨子恣庸妄餘波
遂綺靡當筵供一笑臨鏡鬪雙眉憐爾箏琶
譜公然穢棗梨

紛紛桃李樹蜂蟻鬧成圍標榜誇門戶搜羅
到釣磯披襟甘獨往舉扇障餘暉毀譽隨時
輩吾心久息機

風雅留千古生平有素心讀書惟閉戶高咏
獨捶琴避俗苔痕靜磨人硯跡深新詩一卷
在山水待知音

舟中憶方晴檐家春谷兩孝廉時聞二
君同舟南還

黃河一道接遙天落日浮雲盡可憐
泛泛自誇書畫舫遙遙不見孝廉船
我來眞弄般門斧君去空爭祖
述鞭歸到故鄉應見憶藕花香
放月初圓

泊姚灣

屬邳州過此卽入山左界矣

白首辭家去黃河泛小舟
波平楊柳岸夢入荻花洲
山水違吳越詩書入魯鄒
布帆知客意緩緩過邳州

邳州道中自淮浦至此始見山色

入眼青山起客愁傷心偏記白門秋名園載

酒成星散

戊午秋試塔影園大會賦詩者百餘人熊晴嵐彙而刻之獨客

張帆此浪游怕被驟網催輾轉愛同鷗夢結
綢繆明朝要與孤舟別倚遍蓬窗儘逗遛

泊黃泥岡

山光照眼最多情猶是江南第一程泛水白
鷗常送客浴波花鴨自呼名憐他夢短僮先

睡坐到更殘月漸生去住不須煩料理本來
行李一肩輕

埽垢山房詩鈔第六卷目錄

車中作

嶧縣道中

客舍枕上

滕縣道中

關橋客店

關橋早發

熱甚

過鄒縣

客店晚飯

孔氏南庄小憩

抵曲阜

九如堂

夜坐

明月二首

槿

六月十四夜坐月

偶成二首

曲阜間眺用偶成原韻二首

積雨四首

晚晴

將進酒

行路難三首

坐棗樹下納涼

夜坐

雨不止

洗硯感賦二律

晚眺

大雨

曉起

老樹

雜感二十首

槐花

徙倚

有感二首

憎蠅

新秋暮郊卽事二首

簾

晚

憶弟妹用杜子美得舍弟消息原韻二首

憶淨因用杜子美漫成原韻二首

客懷用浩然寄廣陵舊遊原韻

白紵詞二首

送客曲

埽垢山房詩鈔第七卷

六

甘泉黃文暘

車中作

客途未是嘆途窮底事崎嶇處處同徑仄最
憐駒局促泥深常憶雨空濛路環拔地青山
外人坐行天赤日中記得在家高卧好披襟
消受北窻風

嶧縣道中

未了青連岱先來看嶧山高樓雲出入古驛
水灣環分井溝應在謀生計太艱徑旬時雨
好白鷺自閒閒

客舍枕上

平頭六十鬢如絲早是黃梁飯熟時夜柝聲
聲催短夢不須借枕問鍾離

滕縣道中

舊是滕侯國臨平驛最衝我來問井地憑軾

考遺封強敵憂齊楚通都達冀雍古今形勢
異一樣論輸供

關橋客店

傾仄深嫌薄劣車關橋一枕任橫斜也知小
住原爲客說到長途轉似家歸岫晴雲分嶽
色下山泉水卽天涯聯吟最憶閩中友同坐
空階看月華

關橋早發

登車風愛五更涼倦眼猶思旅客床月黑兔
狐能作幻露濃草木盡生香靜聞鈴語知行
緩屢聽鷄聲覺夜長細數晨星知別恨可憐
身世總茫茫

熱甚

勞勞車馬晝偏長况是炎威未可當日炙尚
嫌衣太薄汗侵似挾雨生涼投林樹遠心先
爽近午天空鳥不翔人世原知行役苦此行

悔煞太匆忙

過鄒縣

六月長征境亦奇
遮頭何處避炎曦
柯南夢遠淳于宅
山左心儀孟子祠
下士青氈甘守
舊上公白璧遠迎師
此來敬爲瞻車服
願學襟期應鑒知

客店晚飯

魚米江鄉憶往時
客中一飯且療飢
自憐老

缺殘牙齒屑麥烹雌總不宜

孔氏南庄小憇

曲池三面絕飛埃暫滌塵襟茗一盃便欲解
衣成小住白蓮無數正花開

抵曲阜

北學生平志登堂願不虛幸游君子國真近
聖人居泮水芹猶茂靈光殿久墟我來尋舊
蹟一一証詩書

九如堂

予投經處也

再拜巍然數仞牆得門而入竟升堂先師遺
訓傳詩禮小子談經陋漢唐敢列丹鉛誇授
受欣看筆墨有輝光依稀靜聽金絲響自檢
高吟故態狂

夜坐

奇峰環几席老樹拂楹檐坐此虛堂靜心儀
陋巷賢一瓢人自樂千里思空懸明月揚州

好回頭意惘然

明月

明月入虛室輝輝照滿牀
故人不可見清夜此時長
著意尋幽夢難忘是異鄉
開窻還小坐暫受北風涼

北風響林表高樹影徘徊
寂寂飛鳥去明明夜月來
巢危原未穩枝借或相猜
偃卧仍欹枕南柯憶古槐

槿

江南編作籬山左長成樹仰面看不足濃陰
覆數步樹大花亦好嫣然浥清露其花大于
盤煜煜開無數曉起遶花行感我屢眷注盈
盈如欲言脈脈通情愫自言顏色好日日新
易故譬彼閨中媛晨粧邢尹妬黛螺換新樣
繡衣拂香炷日暮洗殘紅不敢邀再顧本爲
悅已容反遭世厭惡世人苦不知百年亦旦

暮開花樹之職勤開豈相忤君具達者懷且
賞目所遇我心久夢夢聞此暫開悟此樹此
花好聊可慰旅寓

六月十四日夜坐月

來時殘月照昏黃到日新蟾漸吐光硯匣書
牀剛位置方言食性待商量一輪已見清光
滿午夜先催客思長待把小年移向夜坐看
迴影到東廊

偶成

久把行藏付太虛
風塵慚愧此心初
一簾落日留陳蹟
三徑蒼苔憶舊廬
白晝騰騰常入夢
朱門逐逐老傭書
放懷不若無懷好
拂袖頻登少昊墟

河上仙人嬾上天
囊餘半藥最悠然
卧雲常笑纏腰窄
咽露偏如鼓翼蟬
書劍飄零成一
笑妻孥衣食太堪憐
瓦盆最羨田家樂
生長

兒孫不計年

曲阜間眺用偶成原韻

一夢華胥事本虛
淳風猶見古皇初
買田若得錢成券
附郭何妨草結廬
樹種龍鱗留隙地
耕餘牛角掛殘書
豐年八口多餘粟
輪日分門也趣墟

土人謂之趕集每日各輪一門

蓮花不信長西天

邑無僧尼近亦漸有

鑿井耕田最自

然聞說鳧庭無鼠雀
常留蠹簡伴貂蟬
家多

喬木能傳世砌少閒花不受憐父老偶來談
舊事計時都逾二千年

積雨

積雨不知悶天晴悶亦同相看多樹石不負
好簾櫳密葉藏幽鳥哀鳴慰此翁當軒時獨
立袖手看東蒙

水積廣庭滿靴紋縐似湖便將理畫楫竟去
採雕菰記得烟波好空悲道路殊蜀岡岡下

路辜負綻紅芙

居然成舊雨長此伴朝昏忽忽思良友時時
一扣門茶烟分樹色屐齒破苔痕應入今宵
夢相思好共論

擁衾聽夜雨鄉思更騰騰老屋常防漏山妻
應守鐙隱心空入畫遠客反擔簦知有懷人
句呼兒稿代謄

淨因曾爲予作歸山圖

晚晴

雨多晴亦好爽氣晚軒軒歸岫知雲意呼羣
譯鳥言窻開來霽色水落出高原盼得今宵
月清光到小園

將進酒

君不見高臺妙舞掌上擎鐫刻苕華記小名
又不見吳宮繡甲軍妝靚玉波忽墮雙蓮冷
一樣容華異生死死生只博君王喜玉缸花
滿萬年觴爭鬪紅桃與白李瓦盆釀酒醉青

春卷衣秦女不辭貧莫教撫劍東門去
餽糜相共永相親低田種稻梁高田種麥菽煮飯
白如霜煮酒綠如玉不教飛蓬上妾首與郎
共唱烏烏曲歲時伏臘酒盈尊相斟相酌無
榮辱艷舞嬌歌供畫筵倩他醉眼看神仙酒
散空房墮紅淚綺羅轉瞬化荒烟相如得婦
解裘易酒爲君當鑪感君情厚人生百年貴
適其天一瓢獨酌我亦陶然

行路難

君不見馬四足轅下長鳴苦局促又不見車
兩輪轍迹深深通要津芳草隨春不擇地可
憐碾作道旁塵車中有客塵眯目處處崎嶇
如入蜀苦將性命敵風塵行卷如腰抱一束
下車相揖強軒昂誇說男兒志四方

淺莫若硯中水平莫若案上帟五嶽倏然起
方寸多少間人道路死或山之涯或水之渙

身隱焉用文名不掛牙齒長鏡白木柄擷蘭
採芳芷古之賢達人終身不肯入城市行路
難無遠邇

天門蕩蕩開天達彌羅臺高雲作楣上有豁
落流金之靈章下有兩葉三實之仙芝麟嬌
鳳嬾不受策仰看蔚藍誰置驛閉門且自守
妻子男兒何事太迫蹙閉門安穩卽深山不
信人間行路難

坐棗樹下納涼

一樹臨風束束垂低枝分影照清池
山禽食飽呼羣浴知我忘機總不疑

夜坐

簾紋如水月如霜不寐纔知夏夜長
坐到三更無一事靜聽飛鼠上空梁

雨不止

堦前一望水連空咫尺西齋路不通
簾影沈

沈人寂寂蛙聲閣閣草蓬蓬洗兵常盼天河
瀉積悶何辭一室窮戴笠披蓑吾自樂釣竿
閒煞在淮東

洗硯感賦二律

感遇無端淚若絲紫瓊一片洗清池
凹留舊跡心終苦墨任人磨事亦癡
毀譽誰憑千古定辛勤爾與一鐙知
策勲剩有青氈裏莫羨沈檀巧護持

石田無歲自閒閒不許風塵浣舊顏染出筆
花曾散彩漬深心血久成斑夜窻照月憑銷
遣客路隨車伴往還他日墓銘鐫處士不須
伐石向南山

晚眺

散步城東負手吟天西日落晚陰陰幽懷待
向流雲訴無數昏鴉滿樹林

一 大雨

五言古詩卷之六
二四
一
瞳瞳曉日光如練捧輪恍惚黃人見奇峯當
面忽飛來夏雲壓屋天光變群鳥覓食療朝
饑纔出深林事已非大風撼樹枝欲折啞啞
驚呼不敢歸欲雨未雨作雨勢雲中龍戲聞
腥氣老夫憑闌眼乍明一線遙天露青翠雷
斧當頭忽直下雨濕天低水交瀉妖螭殛死
神龍飛倒捲天河濶大野仿髯虛空集百靈
天馬奔馳走六丁直逐波旬入藕孔乾坤洗

滌光晶瑩此時額手瞻天宇旭日堂堂正當
午

曉起

曉起任科頭空園已獨游夜聞蟲語處草上
露華浮氣澗疑朝雨天清似早秋飄飄拂衣
袂何處惹閒愁

老樹

老樹多疎節青青草寄生一般霑雨露何事

五
異枯榮安土根能厚隨風命本輕對之三嘆
息揮手謝流鶯

雜感二十首

蓼蟲甘食苦巢鳥愛穩睡同居大化中所止
晝方罨揆諸達士懷自知所見隘比似空中
蓬隨風亦嘖嘖

天陰旣愁雨已晴又畏日迫迫陰陽中心神
安得逸况復搜古義一一校得失得失究難

憑多文不若質

主人慮客熱日日爲設冰不用揮塵尾集此
無蒼蠅川流本不息窮陰氣乃凝安得久閉
塞反本水澄澄

高樹拂虛檐濃陰深似墨群鳥畏炎曦借枝
此棲息延頸向我鳴宛如訴胸膈時來飲硯
池筆或拂其翼

南北異食性况復齒零落老饕吻空饒似過

屠門嚼垂鉢問畢羅尚憂勞
齷齪何必辨牢
九揮手謝餽飪

負手何所之望望如荒村
言尋古泮水云是
魯東門昔人不可見
有懷誰與論徘徊楷樹
下懷古愴心魂

雄雞天上鳴群動異所趨
我亦開我戶仰天
將其鬚淪茗潤我吻
吸引頗徐徐食飽事句
讀日居而月諸

黃昏愛枯坐暝色如平日
解襪細爬搔痛癢
手亦慣懷人知不來千里路
漫漫奚奴秉燭
至亂書盈几案

有月不忍睡無月睡亦好
饑鼠窸窸來急起
收殘稿輾轉旣已久昏然
達寅卯客竟或還
家短夢亦草草

期以季冬歸預愁多雨雪
況無狐貉衣何以
禦凜冽人生多遠慮
安能早自決擁鼻且高

吟聊以自怡悅

中庭有奇石雲垂訝天近當屏闖然來輔以
兩石筍石筍二十尺肅立若庶尹岱雲冉冉
來見之頗笑嘖

几案對假山頗欣目所遇蒼翠照鬚眉環植
九松樹高者欲留雲奇者勢拗怒合沓諸峯
中疑有採樵路

昔聞此堂中燦燦占星聚應劉富篇章鄒枚

擅詞賦華棖散高會我來時已暮微吟對明
月憬然成獨寤

西齋沈孝廉讀書破萬卷善以經解經如貫
花以線溝洫考古制水利得通變時來晰疑
義執手頗戀戀

偃僂來一叟俯雍階前草仰面與我言愛其
顏色好自言八十五蠢蠢不知老聞我六十
四欣然羨我小

士
七
言
金
卷
二
二
月
三
才
我有支牀室當戶垂湘簾案上理殘帙大兒
手題籤牀頭開箱篋季弟手封鈴所遇多故
物周旋每不厭

我從江左來遠躋山之左泰山不可見鳧嶧
似招我苦無濟勝具仰高畏礮礮最愛江上
山看山乘畫舸

夜坐愛挑鐙到此惟秉燭孤影飄短髮與我
共歌哭古人秉燭游何事甘幽獨燼長夜已

深伏几肱漸曲

巨蝎緣窻行其聲太瑣碎似以聲聞人教之
早趨避鬼蜮白日多怨毒施曖昧此蟲不自
晦雖毒尚可貸

隙地十餘畝疊石象巖壑老樹互依倚羣峯
競巖岬云昔張南垣皴縐手親作山林生平
志小住亦不惡

槐花

滿地槐花照夕陽
匆匆笑我一生忙
秋江甘伴漁人老
莫爲芙蓉又斷腸

徙倚

何處羈魂不可招
空堦徙倚最無聊
每逢落日尋前約
獨與雕欄結久要
人影淡如雲際
月鄉心準似晚來潮
歸巢數盡投林鳥
剩有哀蟬伴寂寥

有感

瞥眼浮名等落花紛紛蹤跡剩泥沙鈔胥也
說書三篋弄影終成鬼一車大笑蒼蠅汙白
壁高飛彩鳳映朱霞洗紅織素千秋事最愛
微吟手獨叉

拂衣未許俗塵侵枯坐空齋抱膝吟正以知
稀成獨賞不從口衆問同心悠悠天地留清
氣一一宮商譜素琴靜對遺編堪尚友高山
流水待披襟

增蠅

吾鄉多白鳥夜卧帳裁穀此地多青蠅晝坐
簾織竹微蟲亦惱人日夜相徵逐人生天地
間何處不迫蹙

新秋暮郊卽事

胸中五嶽已全平晚步秋郊氣更清橋斷未
須尋渡過山深正好放歌行橫流一道潦爭
集交路三叉草不生踏破蒼苔成獨往飄然

扶杖一身輕

深村幽靜隔塵寰
暝色留人不忍還
鳥散紛紛催落葉
樵歸處處掩柴關
眼先狡兔蒼鷹餓
尾拂蝨蟲黃犢閒
歸去不須愁路黑
照人月已上東山

簾

只隔飛花不隔塵
分明到眼倍傷神
青青草色天涯路
秋雨秋風正惱人

晚

夕陽落盡轉從容
剪燭閒窗事事慵
恨煞丁東傳漏板
催人直接五更鐘

憶弟妹用杜子美得舍弟消息原韻

飄零悲手足惟汝共温存
把卷吟山館聯床
憶水村鰥魚夜獨永

弟婦歿已三年

旅雁月留痕識

得相思路頻來有夢魂

無家憐寡妹依我死爲期

妹適吳石田明經吳志涵之姪也石

田死後妹孤露饑寒志涵擁厚賞而不加悶
收恤予迎歸逾二十年近已爲製一棺矣
過鄰家話間吟阿嫂詩一鐙常憶爾兩地又
經時別絮真難理紛紜比亂絲

憶淨因用杜子美漫成原韻

俗塵無一點賦性湛然清不恨名難就常憂
家未成買山期共隱把卷畢餘生何日酬
志飄然萬慮輕

栽花最惜春愛玩起侵晨花落還留態圖成

更贈人

淨因工寫花卉
索畫者常盈門

心勞家屢空肺病藥

頻傾憶汝常尋夢匆匆記未真

客懷用孟浩然寄廣陵舊游原韻

秋風起旅愁催水日東流
夢遠客中路家居
岸上舟歌空悲宛轉花已嘆
浮游計拙耽儒術
術人生空白頭

白紵詞

緞緞白紵光如銀
織霧裁烟穩稱身
冰蠶絲

盡娥眉顰素娥開奩青女嗔丹青流光飄飛
裙頭上髻頰二三素雲長中爲君拂游塵

飛艷雪舞素霓高燕銀盤光正齊麝蘭風煖
梁塵低一笑流目轉螭蟻酒杯落手神爲迷
不許碧樹啼天鷄娥池拂影秋雲薄鳳臺誰
奏上清樂叢玉聲清聞碧落

送客曲

送客莫傷心登車一揮手目斷三竿日情盡

一杯酒勸君盡此勿復辭且覓黃金買年壽
丈夫家無二頃田仗劍出門心茫然北山雲
逐西山雨草青長路何綿綿賦賣金文換絹
古人陳迹君休羨綵絲且認平原面